



JUDICIAL SYSTEM MONITORING PROGRAMME

PROGRAMA MONITORIZASAUN BA SISTEMA JUDISIÁRIU

***Komunikadu Imprensa***  
***Tribunál Distritál Oe-Cusse***  
**01 Setembru 2014**

## **Tribunál Distrital Oe-Cusse kondena arguidu ba kazu omisidiu agravadu diferente rua ho pena prizaun tinan 18 ba kada arguidu**

Iha 29 Setembru 2014, Tribunál Distrital Oe-Cusse, liuhusi Tribunál Distritál Dili prezide leitura akordaun ba kazu rua ho krime omisidio agravadu ne'ebé involve arguidu OE hasoru nia feen no arguidu MB hasoru lezada hanesan nia kuiñada (arguidu nia maun nia feen). Tribunál konklui prosesu ne'e no kondena arguidu ida-idak ho pena tinan 18 iha prizaun.

*“JSMP apresia desizaun ne'ebé tribunál kondena hasoru arguidu sira. JSMP fiar katak pena ne'e ekilibriu ho hahalok arguidu sira nian no enkoraza membru sosiedade tomak atu evita uza meus violénsia hodi rezolve problema iha uma laran,”* dehan Direitór Ezekutivu JSMP Luis de Oliveira Sampaio.

JSMP observa katak kazu hanesan ne'ebé involve violénsia hasoru fetu kontinua buras ba bebeik mesmu tribunál kondena arguidu sira ho pena ne'ebé todan iha kazu ruma. Krime omisidiu hasoru ema seluk ne'e kazu ne'ebé grave teb-tebes. Nunka iha razaun ne'ebé bele justifika atu ema ida bele hasai ema seluk nia vida. Direitu ba vida nu'udar direitu umanus baziku no direitu konstituisional sidadaun sira nian. Tanba ne'e, Estadu tenke buka meus hot-hotu ne'ebé posível hodi prevene krime omisidiu iha Timor Leste ne'ebé maioria involve fetu hanesan vítima.

Ba kazu ne'ebé involve OE, Ministériu Públiku akuza katak iha 04 Janeiru 2014, iha natar Toep-Ana, Suku Taiboco, Pante-Makassar, arguidu ho lezada diskuti malu kona-ba hamos du'ut iha natar laran. Depois diskuti-malu, sira kontinua hamos du'ut natar nian too loraik. Maibe wainhira fila ba uma arguidu buti lezada nia kakorok, foti tali kesi lezada nia kakorok no rezulta vítima mate iha fatin.

Tuir mai, iha kazu ne'ebé involve MB, Ministériu Públiku akuza katak iha 03 Marsu 2014, lezada du'un arguidu foti nia *memori card* telefone nian. Tanba ne'e lezada ho nia laen ba iha arguidu nia uma atu husu tuir kona-ba *memori card* ne'ebé lakon. Maibe arguidu nervozu no foti ai balok ida kaer ho liman rua baku iha lezada nia matan fukun to'o monu ba rai. Arguidu kontinua baku tan dala 1 iha lezada nia kanuruk.

Maske nune'e, lezada nia laen ne'ebé ba hamutuk ho lezada la halo buat ruma hodi impede ofensa no agresaun ne'ebé arguidu halo ba lezada. Lezada nia laen so dehan deit ba arguidu

katak labele baku hanesan ne'e tanba nia monu ona ba rai. Depoisde akontesimentu, lezada nia laen mak lori lezada ba hospital ho kareta ambulanse maibe depois lora ida tuir mai lezada mate iha hospital.

Ministériu Públiku akuza arguidu sira kontra artigu 139 Kódigu Penál Timor Leste kona-na omisiduu agravadu.

Iha audiensia julgamentu arguidu sira konfesa faktus ne'ebé deskreve ona iha akuzasaun Ministériu Públiku nian.

Iha alegasaun finál, Ministériu Públiku husu tribunál atu kondena arguidu OE ho pena prizaun tinan 20 tanba komete krime omisiduu hasoru nia feen. Entertantu ba arguidu MB, Ministériu Públiku husu tribunál kondena ho pena prizaun tinan 24, tanba antes ne'e arguidu komete ona krime ne'ebé hanesan hasoru nia subriña iha tempu Indonezia.

Enkuantu defeza husu ba tribunál aplika pena ne'ebé mais adekuaudu no justu ba arguidu sira tanba arguidu sira konfesa faktus totalmente.

Iha 29 Setembru 2014, através hosi Tribunál Distritál Dili prezide leitura akordaun ba arguidu sira no kondena arguidu sira ida-idak ho pena tinan 18 iha prizaun.

Audiensia julgamentu ne'e diriye husi Dr. João Ribeiro, Ministériu Públiku representa husi Dr. Amrosio R. Freitas no arguidu sira hetan defeza husi Dr. Calisto Tout husi Defensória Públiku.

“Kommunikadu imprensa ida ne'e bele imprimi tan ho apoiu jenerozu husi povu Amerikanu liu husi Ajensia Estados Unidos ba Dezenvolvimentu Internasionál (USAID) bazeia ba Akordu Kooperasaun ho Número AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne'e nia laran no la nesesariamente refleta USAID ka Governu Estados Unidos Amerikanu nia opiniaun”.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail:luis@jsmp.minihub.org

Telefone:3323883/77295795

Website: <<http://www.jsmp.tl>> www.jsmp.tl

Facebook: <<http://www.facebook.com/timorleste.jsmp>>

[www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl